

# Yóm Tekang Kbuten

tehe kedlimun Dwata yó kem  
kentihen

1 1Bè yóm hol tekang  
kbuten, dlimun Dwata  
longit ne tonok. 2Yóm tonok, là  
kóen mtukul kmoen, ne laen se  
dù bang tonem tahan lemwót bë  
yóm tey él nelem lemidun du,  
lel yóm tey kifu mget bë  
klamangen. Lemwót yóm Tulus  
Dwata tendo heklowong gu  
tahan. 3Ne yó udél Dwata,  
monen, “Dlimunu layag.” Tahu

se, tódô sen-gengen se lemayag.  
4Ne tey hyu kton Dwata du yóm  
layag yó. Ominen yó semtólóng  
yóm layag bë yóm kifu. 5Yó  
boluyen du yóm layag, “Kdaw,”  
ne yóm kkifuhen, “Kifu.”  
Timbow deng kmoen du yóm yó,  
ominen kifu ne bud mwas, tu se  
yóm hol tanay kdaw.

6,7Ne yó bud udél Dwata,  
monen, “Na sen-gawag dé yóm  
él anì wen lewu gónón nô.”  
Tahu se, tódô sgawag yóm él.  
Wen él nô fi laan, ne wen se

él nô fi ta. 8Yó boluy Dwata du yóm gónón sgawag, “Longit.” Timbow deng kmoen du yóm yó, ominen bud kifu ne bud mwas, tu se yóm gewuhen kdaw.

9Ne yó bud udél Dwata, monen, “Na gotu senbusung lu dé yó kem kdéen él nô laan longit anì gfan yóm fi laanen.” Tahu se, tódô kéng ulitem du. 10Yó boluyen yóm mékéng deng gfan, “Tonok,” ne yó boluyen yóm él deng sbusung, “Mohin.” Ne tey hyu kton Dwata du yóm deng nmoen yó. 11 Yó bud udél Dwata, monen, “Dlimunu anì tódô kentihen kay hulu tmowok gu lem tonok, kem bnes ne kem hulu ne kem koyu. Bè ket hulu

tmowok sal stólóng kbungu le ne eles wen lem le mó bud tmowok. Senged se bè koyu mungu, sal eles mung bè bungu le lem le mó bud gel tmowok. Ne bè yóm bud gel ktowok le, tódô sulit bè yóm sana kul gel kmò.” Tahu se, tódô kéng ulitem du. 12Tódô sut gu lem tonok kentihen tmowok talak tonok. Bè ket tmowok, sal stólóng lem le mó bud tmowok. Ne bè yóm bud ktowok le, tódô sulit bè yóm kul gel kmò. Ne tey hyu kton Dwata du yóm deng dlimunen yó. 13Timbow deng kmoen du yóm yó, ominen bud kifu ne bud mwas, tu se yóm getluhen kdaw.

14Omin Dwata bud mon du, “Dlimunu yó kem mnóng bè

longit mò semtólóng yóm kdaw bë yóm kifu, ne mò gónô milô yóm sendaw ne yóm sfalay ne yóm bulón kmò hulu. 15 Mnóng le gu bë longit anì hol lemayag ete tonok.” Tahu se, tódô kéng ulitem du. 16Wen yóm lewu bong dlimun Dwata mò mnóng. Dlimunen kdaw mò hlayagen ke kendaw, ne dlimunen bulón mò hlayagen ke kifu. Ne homong dlimunen snéen yó kem blotik. 17Suen bë longit yó kem mnóng yó mò lemayag ete tonok, 18mò mnóng kemdaw ne mò mnóng kifu anì wen gónón stólóng yóm layag bë yóm kifu. Ne tey hyu kton Dwata du yóm deng dlimunen yó. 19Timbow deng kmoen du yóm yó, ominen bud kifu ne bud mwas, tu se yóm gfaten kdaw.

20Yó bud udél Dwata, monen, “Dlimunu kentihen mowil lem él mò nô bë yóm él deng bnuungu anì hol wen nô lemen. Ne dlimunu se kentihen gel móyóng te kmawang anì hol wen móyóng ta.” 21Tahu se, dlimun Dwata yó kem klambaden utón lembang nô lem mohin dalang se yó kem kentihen mowil gel nô lem él. Ne yó kem kentihen gel móyóng te kmawang, gotu dlimun Dwata lu. Ne kdê yó kem

dlimunen yó, bë yóm bud kból le, tódô sulit bë yóm sana kul gel kmò. Ne tey hyu kton Dwata du yóm deng dlimunen yó. 22Ne wen oluhen kul, monen mò kul, “Hol ye mból anì hol wen nô lem él ne nô lem mohin, ne anì hol wen móyóng te kmawang.” 23Timbow deng kmoen du yóm yó, ominen bud kifu ne bud mwas, tu se yóm glimuhen kdaw.

24Yó bud udél Dwata, monen, “Dlimunu tódô lemwót gu bë tonok yó kem kentihen kay ógof mò nô talak tonok, kem ógof mò tnomò ne kem ógof nô lem bnes, kewóten bë yó kem lebangen kkólen bë yó kem leneken. Ne kdê yó kem dlimunu yó, bë yóm bud kból le, tódô sulit bë yóm sana kul gel kmò.” Ne tahu se, tódô kéng ulitem du. 25Duhen yó, deng gotu dlimun Dwata yóm kdê le, ne bë yóm bud kból le, tódô sulit bë yóm sana kul kmò. Ne tey hyu kton Dwata kul.

26Ne yó bud udél Dwata, monen, “Mò te tau dé, <sup>a</sup> heskél te lu bélê te mò mkem yó kem kentihen mowil lem él, ne yó kem kentihen móyóng te kmawang, ne yó kem kentihen kay ógof, kem ógof mò tnomò ne kem ógof nô lem bnes, kewóten

<sup>a</sup> 1:26 Yóm udél Dwata bë bérs 26 yó, yóm monen, “Mò te tau dé,” gbak ebélê le tlù le yóm monen yó koni: Dwata, ne yóm Ngaen, ne yóm Tulusen.

bè yó kem lebangen kkólen bè yó kem leneken.” 27Tahu se, nmò Dwata tau ne heskélen lu béléen. Nmoen logi ne nmoen libun. 28Ne wen oluhen kul, monen, “Hol ye mból anì tódô tfeng clamangen benwu yó kem angat lugod ye mò kmamal du. Hkemu kuy yó kem kentihen mowil lem él, ne yó kem kentihen gel móyóng te kmawang, ne yó kem kentihen ógof nô talak tonok. 29Blayu kuy yó kem kentihen hulu tmowok te tonok ne yó kem kentihen bungu koyu mò ken ye. 30Okóm bè yó kem ógof te tonok ne yó kem onuk móyóng te kmawang, deng tey dê kay bnes dlimunu bélê le mò kul ken.” Ne tahu se, kéng ulitem du. 31Omin Dwata bud temngel du yó kem kdê deng dlimunen yó, ne tey bong hyu ktonen kul. Timbow deng kmoen du yóm yó, ominen bud kifu ne bud mwas, tu se yóm gnemen kdaw.

**2** 1Duhen yó, deng gotu deng ne kedlimun Dwata du yóm longit ne yóm tonok ne yó kem kdéen ton ta le. 2Bè yóm ghituhéen kdaw, là buden mò nmò Dwata, deng gotu deng ne kedlimunen du yóm kentihen. 3Ne wen oluhen du yóm ghituhéen kdaw yó, htólóngen mò kun, abay se bè yóm kdaw yó, là

buden mò nmò, deng gotu deng ne kedlimunen du yóm kentihen. 4Yó se tehe kmò kedlimun Dwata du yóm longit ne yóm tonok ne yó kem kdéen ton ta le.

### yóm hungul koyu lamang boluyen Idin

Bè yóm tehe kedlimun yóm sana Dwata hol góñô mogot du yóm longit ne yóm tonok, 5laen kô dù hulu tonem ta yóm tonok, ne laen se dù lem hulu lemsob tahan, abay se là deng hkulón Dwata du he, lelen yó he laen se dù tau mò hulu. 6Okóm balù yóm là deng kekulón Dwata du, wen él tembul gu lem tonok mò hméfê du.

7Bè yóm tehe kmò Dwata tau, wen tonok nwahen, ne nifilen, henbalingen tau. Ominen myuf lem ilungen yóm nawa mò hlowil du, ne tódô mnawa yóm tau nifilen yó, ne sen-gengen se mowil.

8Ne wen hungul koyu nmò Dwata bè yóm benwu boluyen Idin bè fi dmata kdaw, ne bè yó góñón hemisù du yóm tau deng nifilen. 9Tódô kentihen koyu alì tilob mton du, gotu htowok Dwata bè yó, hlò kem koyu tilob kbungu le. Bè hol góñón sóol yóm hungul nmoen yó, wen sotu koyu mteg bè yó ke gken tau bunguhéen, tódô hlós mowil. Ne wen bud sotu koyu mteg bè yó

ke gken tau bunguhen, tngónen yóm hyu ne tngónen snéen yóm sidek.

10Bè yóm hungul Idin yó, wen él bong mlel gu lemen mò hméfê du. Yóm él yó, fat góñón mesgólól bë senbwak yóm hungul. 11Yóm tanay lelen, boluyen Pisun, mlel etu gu lem yóm benwu boluyen Habilä. (12Bè yóm benwu yó góñón nô yóm blówón laen kô dù bolein, ne yóm sotu kay litok koyu alì tilob boohen, ne yó kem botu tilob alì mebtes.) 13Ne yóm gewu lel yóm él yó, boluyen Gihun, mlel etu gu lem yóm benwu boluyen Kus. 14Ne yóm getluhen, boluyen Tigris, mlel etu fi dmata kdaw yóm benwu Asirya. Ne yóm gfat lelen, boluyen Yufratis.

15Ne yó nmò Dwata, suen bë yóm hungul Idin yó yóm tau nifilen mò mò hulu bë yó ne mò mentey du. 16Yó mon Dwata bë yóm tau nifilen yó, monen, “Gbekem mken du nô kihu bungu koyu bë nim hungul ni. 17Tek són yóm koyu mteg talaken, ke gkenem bunguhen, angat tngónem yóm hyu, ne angat tngónem snéen yóm sidek. Hol béem ken bunguhen, abay se ke gkenem, angati matay bë yóm kdaw kkenem du.”

18Yó bud mon Dwata, monen, “Là hyuhen béléen nim tau nifilu

ni ke tek sotuhen. Yó hyu, moe béléen dumuhen sekloón mò tóbóng lówóhen.” 19Tahu se, gotu nwit Dwata ebè yóm tau nifilen yó yó kem kentihen deng tehe dlimunen lemwt bë tonok, yó kem kentihen ógóf nô te tonok ne kentihen onuk móyóng te kmawang. Ne hmoen du boluy le. Ne yó se buten yóm kwen kul mdengen boluy yó kem kdê le. 20Tahu se, gotu nmò yóm tau nifil Dwata yó boluy yó kem kentihen onuk móyóng te kmawang ne kentihen ógóf nô te tonok. Okóm balù sotu bélê le ke sekloón béléen mò tóbóng lówóhen.

21Omin Dwata henga htungô yóm tau yó, ne bë yóm igoen lemnga, tódô dilot Dwata béléen sotu tiol lohoken, ne kendel hekdimolen yóm ungeden. 22Tódô henbalin Dwata libun yóm tiol lohoken yó koni, ominen mit du ebè yóm logi. 23Ne yó mon yóm logi yó, monen,

“Ni dii hol dou dumu sekloón.

Dou tiol yóm kun tiol,  
Ne dou unged se yóm kun  
unged.

Boluyu du libun abay se bë  
logi góñón lemwt.”

24Yó góñóm mon, yóm tau ke myehen, gtagaken maen ne yéen, ne tódô le setlomin yóm

kun tuha libun, baling le ssotu yóm lewu le.

**25**Bè yóm kdaw yó, tódô mógów hlówó yóm logi ne yóm libun yó, okóm là kô le myak du.

**yóm là kimón tau**

**3** **1**Bè kdê yó kem gel nô lem bnes deng dlimun yóm sana Dwata hol gónô mogot, ulal yóm alì hulung smukat bélê le. Ne snólók yóm ulal yóm libun, monen, “Tahu kô deng mon Dwata mò kuy hol bê ye abay ken yó kem bungu koyu bè nim hungul ni?”

**2**Ne yó balaen du yóm libun, monen, “Gbek me mken du nô kihu kay bungu koyu bè nim hungul ni, **3**tek són yóm koyu mteg bè gónón sóól, là hken Dwata du kum bunguhen, balù kdù me du, là gmò me du. Ke yó nmò me, matay me.”

**4**Ne bud mon yóm ulal bè yóm libun, “Bógem, là kóen tahu yó, là kô ye nee matay. **5**Yó gónô Dwata mngali du kuy yóm yó, abay se tngónen ke ken ye, angat ye mklé béléen, tngón ye yóm hyu, ne tngón ye se yóm sidek.”

**6**Timbow henklol hnunu yóm libun yóm koyu yó, tey minggel ktonen du, ne hendemen dô hyu mken du bunguhen, lelen hemdem du tey hyu ke baling temngón. Yó gónón wen nwahlen bè yó kem bunguhen, ne kenen.

Ominen wen blayen ke tuha logihen, ne kenen se kun. **7**Uni le mken du, tódô wen tngón le, ne ton le tódô le hlówó. Yó ne sotu kun ma doun koyu fig, tenbé le mò dowin le.

**8**Nee móyón kifu bè yó, tódô gun gol le yóm Dwata hol gónô mogot mógów talak yóm hungul, ne mom yó nmò le, mom henbnos le Dwata lem blóng yó kem koyu. **9**Okóm tnaba Dwata yóm logi, monen, “Gónóm nô de?”

**10**Yó balaen du yóm logi yó, monen, “Gungolu u se yóm kkólem bè ni, okóm likoe, henbnosu u, abay se tódóe hlówó.”

**11**Ne yó snólók Dwata béléen, monen, “Tau du se tmulón du kóm yóm tódô kehlówóhem? Deng kenem kô yóm bungu koyu ngalihu kuy?”

**12**Ne yó balaen du yóm logi, monen, “Yó sem libun nmoem mò dumuhu bemlay du do, ne kenu.”

**13**Ne snólók Dwata yóm libun, monen mò du, “Moen du ke nmoem nim ni?”

Ne yó balaen du yóm libun, monen, “Abay kenu dou, yó sem ulal fen smukat dou.”

**ktafak Dwata kul le Adam ne Ib**

**14**Ne yó mon Dwata ebè yóm ulal, monen, “Bè nim nmoem ni,

wen tafaku kóm. Bè kdê yó kem ógóf talak tonok, tek són uu gembô du nim tafak ni. Lenwóten bè nim kdaw ni efet kól bë hol sónen, sónmoem mulu se kóm, ne sónmoem mken kfung bë yóm klawihem mowil. 15Hlós senfohonu yu yóm libun. Yóm kun lugod ne yóm kóm lugod, angat sónmò le tendo sfohon. Okóm wen bë kun lugod yóm libun angat lenunahen kuluhem. Ne yóm kóm lugod, fen nékéten bë tekeden.”

16Ne yó bud mon Dwata ebè yóm libun, monen, “Angat temnuu yóm ksídek kegnómém du bë yóm keblututem, ne angat hol hdesu yóm ksut blututem. Baluen se ke lómón yó kmoen, là kóen skó yóm óyô lówóhem du yóm tuha logihem, ne du se angat kuluhem.”

17Ne yó udél Dwata ebè yóm logi, monen, “Deng nimónem udél tuha libunem, ne deng kenem yóm bungu koyu ngalihu kuy. Lemwót bë nim nmoem ni, mung golu béléem klamangen tonok. Bè yóm klawihem mowil, ke là nahi hol mò nmò, là kô wen gónóm ma mò ken ye. 18 Tendo senflós mget kluonen yóm tonok, ne hlós tmowok tahan yóm tey bnes semnual. Baluen ke lómón ni mò kmoen, wen gel huluhem mò ken ye. 19Ke là nam na ninget mò hulu, là kói

gemtob ken. Ni se mò kmoen béléem efet bud kbalingem tonok, abay se bë tonok tehe gónóm gu lemwót. Nifilu u lemwót gu bë tonok, ne angati bud baling tonok.”

20Ne yó boluy Adam du yóm libun yehenen, Ib, abay se du yê yó kem kdéen tau mowil te tonok. 21Ne wen nes lemwót bë kulit ógóf nmò Dwata bë Adam lewu le Ib mò nes le.

### keh dó Dwata ke Adam ne Ib bë yóm hungul Idin

22Ne yó bud mon yóm Dwata hol gónô mogot, monen, “Ngem yóm tau, deng balig mkél kut, deng tngónen yóm hyu, ne deng tngónen snéen yóm sidek. Hol là hyuhen ke ma bë yóm koyu hlowil tau, abay se ke kenen, tódô hlós mowil.” 23Yó gónóm mon, tódô hdó Dwata le Adam bë yóm hungul Idin anì nbuten mò nmò ta yóm tonok tehe gónón gu lemwót. 24Ne wen kem hógówen gu bë longit hunungen bë fi dmata kdaw yóm hungul yó. Wen tey sudeng sù Dwata bë yó snéen, tendo eles sedlu dilóf bë baken ne tendo hilóy lowi anì laen dù tau gehloni ebè yóm koyu hlowil tau.

**Yóm Tekang Kbuten  
ne  
Yóm Kehewà Le Gu Bè Idyip**

**ISBN 971-826-015-3**

**© The Bible League, 2000**